

一心敬禮十方常住三寶

如是禮已，隨所有香華等當脩供養，作是唱言：

嚴持香華如法供養

願此香華雲 遍滿十方界 供養一切佛

尊法諸賢聖 無邊佛土中 受用作佛事

至此停唱，散華作供，手執香爐，作是想云：

一切佛法僧寶，體常遍滿，無所不在。願今以此香華等同法性，普熏一切諸佛刹土，施作佛事。十方一切供具無時不有，我今當以十方所有一切種種香華、瓔珞、幢幡、寶蓋、諸珍妙飾、種種音樂、燈明燭火、飲食、衣服、臥具、湯藥，乃至盡十方所有一切種種莊嚴供養之具，憶想遙擬，普共眾生，奉獻供養。一切世界中，有脩供養者，我今隨喜。若未脩供養者，願得開導令脩供養。又願我身速能遍至一切刹土，於一一佛法僧所，各以一切種種莊嚴供養之具，共一切眾生等持奉獻，供養一切諸佛法身、色身、舍利、形像、浮圖、廟塔、一切佛事。供養一切所有法藏及說法處，供養一切賢聖僧眾。願共一切眾生脩行如是供養已，漸得成就六波羅蜜，四無量心。深知一切法，本來寂靜，無生無滅，一味平等，離念清淨，畢竟圓滿。

此段全用經文作是念已，唱云：

供養已 一切恭敬 一禮

第四啟請三寶諸天

本經無啟請法，准餘行儀，於建首日，宜致三請。良以三寶雖無所不在，而眾生久積迷惑，背覺合塵，念與悲隔。今既翻迷歸悟，應須緣念三寶，充滿虛空，應物現形，如水中月。作是念已，涕淚翹勤，逐位三請，手執香爐，燒眾名香，口作是唱：

一心奉請南無本師釋迦牟尼佛